

15 AOGOSITRA 2018

MASINA MARIA VIRJINY NAMPIAKARINA

ANY AN-DANITRA



***Nanao zava-dehibe tamiko ilay Mahefa;
nasandrany ireo manetry tena.***

Izao faha 15 aogositra izao no iarahan'ny Eglizy eran-tany mankalaza amin'ny fomba manetriketrika ny nampiakarina an'i Masina Maria any an-danitra. Fety lehibe ho an'ny Eglizy izany satria ny fidiran'i Masina Maria ao amin'ny voninahitr'Andriamanitra no ankalazaintsika anio. Tsara marihina fa hafa ny fomba fiteny raha hilaza an'i Jesoa nitsangan-ko velona sy niakatra any an-danitra. Fa Masina Maria kosa lazaina hoe Nampakarina any an-danitra izany hoe tsy vokatry ny famendrehan'i Masina fa vokatry ny fanomezam-pahasoavana manokana avy amin'i Jesoa zanany no ampakarana azy. Finoana no andraisantsika an'izany satria i Masina Maria no Renin'i Jesoa ary i Jesoa dia zanak'Andriamanitra ka noho izany dia Renin'Andriamanitra i Maria. Ao amin'ny voninahitry ny zanany izany i Masina Maria ary fanomezam-pahasoavana manokana avy amin'i Jesoa zanany, avy amin'ny famonjena nentin'i Jesoa izany ka i Masina Maria no nisantatra azy tahaka ny fandraisany an'i Jesoa tao ambohoka raha nitondra azy ho eo amin'izao tontolo izao izy vokatry ny asan'ny Fanahy Masina.

Toy izany koa ny fanomezam-pahasoavana ny amin'ny maha notorontoronina tsy azonkeloka azy "Immaculée conception", izany no finoan'ny Eglizy katolika.

Vakiteny I : Apôk. 11, 19a; 12, 1-6ab. 10ab

Salamo : Sal. 44

Vakiteny II : 1 Kôr. 15, 20-26b

Evanjely : Lk. 1, 39-56

Ny fomba fisehoan'ny finoana dia tsy hoe mandeha hoazy fa vokatry ny asan'ny Fanahy Masina sy fandalinantsika olombelona an'izany finoana izany ka omen'i Jesoa sy omen'Andriamanitra ny Eglizy ka noho izany na dia efa notsaroan'ny Eglizy hatraminy voalohany ny nampakarina an'i MASINA MARIA any an-danitra, ary efa niainany sy nahatoky fa izany tokoa hatramin'ny voalohany izy, tamin'ny nolazaina fa Andriamanitra tokoa i Jesoa, olona faharoa amin'ny

Trinite masina, tonga olombelona ka noho ny fahatongavany olombelona tamin'ny alalan'i Masina Maria dia izy ilay renin'Andriamanitra ka raha tafiditra amin'ny voninahiny i Jesoa dia nampidiriny manokana amin'izany fahasoavana

izany ao aminy voninahiny koa ny reniny zary santatra ho antsika, izany no finoana efa nankalazain'ny eglizy hatramizay nefa taty aorina fa nambara ho Teny finoana (dogma).

Nanomboka tamin'ny faha 1950 ny papa faharoa ambin'ny folo no nanambara amin'ny fomba manetriketrika ny dogma rehefa niseho tamin'ny Mb Catherine Labouré ao amin'ny rue du bac Paris sy niseho tamin'ny Mb Bernadette tao Lourdes, nanomboka tamizay ary neken'ny Eglizy ny dogma ny niakarany Masina Masina any an-danitra.

Tsara marihina tsy hoe Andriamanitra i Masina Maria, olombelona toa antsika izy ary izany no mahafaly antsika satria olombelona izy nisantatra izany fahasoavan-dehibe izany. Raha miombona amin'i Jesoa tahaka ny nataon'i Masina Maria isika dia any koa no ivantanantsika. Raha mitoetra ao amin'i Jesoa isika dia mamokatra ary hatramin'ny fiainana mandrakizay. Mamokatra amin'ny Eglizy Olona Velona eto an-tany sy ny Eglizy any an-danitra izay any no misy an'ireo olomasina ary i Masina Maria no lohalaharana amin'izany. Masina izy ireo satria miombona tanteraka amin'Andriamanitra ary dia izany no ankalazaintsika androany faha 15 aogositra. Tsara marihina koa fa i Masina Maria no nisantatra izany rehetra izany ho raisintsika rehetra ary santarintsika ihany koa amin'ny alalan'ny Eokaristia araka ny efa nolazaintsika teo i MASINA MARIA dia nandray ny Fanahy Masina ary isika koa amin'ny alalan'ny batemy sy konfirmasio dia mandray ny Fanahy Masina ka miombona amin'i Jesoa tokoa ary tonga Kristy mpiara-belona amin'olona. Masina Maria koa dia nisantatra ny fiombonam-pijaliana amin'i Jesoa teo amin'ny fototry ny hazo fijaliana sy notorontoronina ny fony madio ho azy ka santarintsika koa izany amin'ireny sedram-piainana maro samihafa fa indrindra raha mijoro ho vavolombelona isika. Aoka ho fantantsika fa i Masina Maria no misantatra fa isika ihany koa dia miandry an'izany sady feno fanantenana, ary finoana ny fiombonana amin'izany.

Tsara marihina faharoa koa fa izay rehetra iainantsika dia entintsika any amin'ny fiainana mandrakizay ka aoka hiezahantsika hahatonga antsika ho tena Eglizy Olona Velona amin'ny fiainantsika. Tsy ny fahafatesana no faranteny fa ny fitiavan'Andriamanitra sy ny famindrampony ary izany no mibaribary amin'ny fampiakarana an'i Masina Maria any an-danitra izao izany hoe raha tonga any an-danitra i Masina Maria lasa Andriamanitra izy fa miombona tanteraka amin'i Jesoa zanany ary izany no mahatonga azy afaka mivavaka ho antsika, mikolokolo sy mikarakara antsika mandrakariva ary miombona anjara amin'izany famonjena entin'i Jesoa zanany amin'ny alalan'ny vavaka izay ataony.

Eto am-pamaranana ny fampianarana izao dia aoka ho fantantsika fa marim-pototra tokoa ny fitiavana manokana ananantsika an'i Masina Maria, tena mpialoha lalana antsika izy ary izy no nisantatra izany rehetra izany ka zary modely ho antsika tokoa izy amin'ny fiombonana amin'i Jesoa, amin'ny fitokisany amin'i Jesoa, amin'ny fandraisany ny tenin'Andriamanitra dia i Jesoa. Raha isika mandray ny tenin'Andriamanitra ka mivelona ny tenin'Andriamanitra tahaka azy, izy izay nanao hoe "Inty aho, aoka ho tanteraka amiko araka ny teninao", izany koa no fampianarana ho antsika dia tanterak'Andriamanitra amintsika tokoa ny sitrany, manao ny sitrak'Andriamanitra dia mitoetra ao amintsika i Jesoa sy itoerany isika dia mamokatra ny fiainantsika.

Tsy hoe mikombona izany fa manao tahaka an'i Masina Maria izay nizara ny tenin'Andriamanitra amin'ny mpiara-belona tahaka ny nataony tamin'i Elizabeta rahavaviny, isika koa tsy maintsy mizara izany tenin'Andriamanitra izany amin'ny mpiara-belona amintsika.

I Masina Maria no modely ny tabernakla ho antsika satria nitoeran'i Jesoa izy, io no tabernakla hitantsika ao an-deglizy izay mirehitra lalandava, toerana itoeran'i Jesoa ka isika koa no tabernakla amin'izao andro iainantsika izao. Masina Maria no modely ho antsika amin'ny fandraisana an'i Jesoa. Izy koa no modely ho antsika amin'ireo fahaizana mandray ireo fijaliana isankarazany, tsy ireo no faran-teny fa ireo no mampiombona antsika amin'i Jesoa mijaly ka miara-maty amin'i Jesoa amin'ny fahotana isika ka hiaraka hitsangana aminy koa dia ny fiainana mandrakizay no tanjona ho antsika ka enga anie i Masina Maria nampakarina any an-danitra hiara-dalana amintsika mandrakariva fa indrindra amin'ny fotoan-tsarotra ireny ka hampirehidrehitra ny finoantsika ka ny finoana no entintsika misedra ireny fiainana maro isankarazany ka hampamokatra azy eo amin'ny fiainantsika.

Ry Kristianina Havana, aoka ho tahaka an'i Masina Maria ny fiainantsika ka amin'izay dia hiombona anjara aminy koa isika any amin'ny fiainan-koavy ka hiaraka hidera sy hankalza ny Trinite masina tahaka azy ka hiaraka amin'ny anjely sy ny olomasina rehetra.

Ry Jesoa zokinay ô, i Masina Maria dia miombona voninahitra aminao any an-danitra, reninao izy nandalo tety antany, nahalala ny fiainanay olombelona izy, ny hafaliana, ny fahoriana, ny tebiteby, ny fanantenana sy ny hakiviana koa ampio izahay hanahaka an'i Masina Maria reninao hahay handray anao sy hitondra anao eo amin'ny mpiarabelona, ho tabernakla velona izahay fa indrindra ny fivelomanay ny vokatry ny filankevitra pastôraly izao ka ho taranaka mpanorina tokoa izahay, tahaka an'i Masina Maria nanorina fiainam-baovao ao aminao. Amen

Mompera Arseveka Mgr Benjamin Ramaroson